

# Progetto di Cittadinanza Corsa

*Pè una cittadinanza di progressu*



# PÀ UNA CITATANANZA CORSA DI U XXI<sup>ESIMU</sup> SEICULU

*Documentu di rifarenza cuncipitu da a Manca à nant' à u tema di a citatananza*

**JUS SOLI, JUS SANGUINIS, JUS CIVITATIS, JUS SUDORIS**  
(drittu di a tarra, drittu di u sangue, drittu di cità, drittu di u sudore)

## **I ) A citatananza corsa di pettu à u cuntestu storicu oghjincu**

E quistione d'appartenenza à una nazione, o à dilla di modu più precisu i dibattiti è pulemiche chì rimuscianu a nostra sucetà nant' à stu puntu, intarrucheghjanu l'inseme di i partiti pulitichi in Corsica è sopra tuttu quelli chì si rivendicheghjanu di l'autonomia, di l'indipendenza o di u drittu à l'autodeterminazione.

Dipoi a so crazione, a Manca s'hè primurata di a quistione di prima trinca ch'ella ripresenta a citatananza, a so definizione è a so pratica. È dipoi tandu, cuntinueghja à intarrughà e strutture di u movimentu nazionale è di modu più largu ancu l'inseme di a sucetà.

D'altri, tutti agitadori di sta sfera fascista multiforma chì impuzzichisce u clima puliticu è suciale, s' afferranu oramai sta quistione, mossi ch'elli sò da una voglia di scludere, di scantà in nome di un razzisimu rozu chì punta à a violenza.

Mentre ch'elli ribombanu i nostri carrughji cù l'ecu funestu di e manifestazione accadute ingrentu à i « Jardins de l'Empereur » et in Lupinu, dop'à l'avvenimenti di Prunelli di Fium'Orbu è di Siscu, vistu u clima economicu è suciale pessimu, urge d'organizà una mubilisazione ampia di pettu à i pericoli ch'ella ripresenta a sparghjiera sempre più larga di « l'idee » di strema dritta in a ghjuventù è in e classe popolare.

Ci tocca à fundà sta mubilisazione nant' à :

- Una riflissione arrimbata nant' à bilanci storici, culturali, economicu è sociologicu
- A vultintà di custruisce una definizione chjara è pricisa di a citatananza corsa di u XXI<sup>esimu</sup> seiculu.
- Una visione chì sappia à tempu mette in pezzi i schemi di dipendenza clanisti è prupone un prugettu di sucetà capace d'assicurà tutti di dritti di l'Omi è d'abulisce tutte e forme d'alienazione, prupunendu cum'è puntellu puliticu l'autogestione.

## **À novu cuntestu puliticu, nove rispunsabilità.**

Postu chì di dicembre 2015, un forte parcintuale di l'alittori hà purtatu u so votu nant' à membri di l'alleanza Femu a Corsica/Corsica Libera, sti membri stessi sò oramai in punta di l'azione pulitica.

Ùn vole micca di chì l'altre furmazione, micca ripresentate ingrentu à l'Istituzione, sianu dispensate da l'oblicu di chjarificazione ch'ella impone a pessima situazione attuale. Ma e furmazione chì millaie è millaie di Corsi cunsidareghjanu cum'è e più ripresentative è in capacità d'esercità rispunsabilità assignalate, sò tinute à rispittà un'etica pulitica è tandu à chjarificà e so pusizione.

## **L'elementi chì indettanu un periculu.**

In 2012, in tempu d'alizzone presidenziale, u FN hà avutu più di 24% di i voti sprimati. Hè statu u sicondu risultatu più forte dopu à quellu di N. Sarkozy. Inde numarosi scagni, stu cifru franca a sòglia di 30%. Si pò mostrà chì a carta di l'alitturatu nazionalistu corrisponde spessu à quella di u partitu di strema dritta. À sti risultati alitturali si pò aghjustà a rimessa in causa di a nuzione di « cumunità di destinù » fatta da un militante nazionalistu di sempre, presente nant' à u tarrenu puliticu è associativu è ancu da un capu cintrale di e furmazione nazionaliste à u putere, autore di un testu chì pratende mette in risaltu « e radice cristiane di a Corsica ».



### Risposte ch'ùn cunvenenu à stràvii concettuali

Intarrugati in 2012 nant'à a forte prubabilità di un votu FN vinutu da una parte impurtante di u so alitturatu tradiziunale, parechji rispunsèvule nazionalisti o dicenu di nò o dinuncianu ciò ch'elli chjamanu càculi abusivi o sprisupitati.

Ciò ch'ùn tene micca dopu fatta l'anàlisi, hè ch'elli assicuranu à l'incuntràriu chì u movimentu nazionale hà sempre cumbattutu a stretta dritta è ch'ellu ferma u solu à avè cuncippitu un prugettu di sucetà fundatu nant'à valori di solidarietà, d'ospitalità è di tolleranza di a sucetà corsa tradiziunale. Tandù dui fatti sò mintuvati cum'è asempii storici da ghjustificà l'argumentu messu in ballu, vale à di a prutezzione di i Ghjudei in tempu di a Siconda Guerra mundiale è ancu l'upposizione storica radicale di u movimentu nazionalistu à u FN.<sup>1</sup>

Sti dui argumenti si ponu piglià in contu s'omu sta attenti à sbarazzà si di e simplicazione (pirculose pà a riflessione è l'azione oghje chì ghjè oghje).

Di modu complessu, a storia di u nostru paese dice e solidarietà chì si sò messe in via à a discriminazione è à a dipurtazione di i Ghjudei. Mais dice dinò i stràvii inghjustifichèvuli di una purzione pulitica vinuta da u movimentu cursistu di tandu.<sup>2</sup>

Stu movimentu cursistu mustrèndu si cusì permeabile à e tesi fasciste, l'hà fattu currisponde cù tematiche etniciste ch'ellu purtava. Una mimoria mozza, à pezzi ùn aghjova à l'emancipazione. Peghju, li porta prighjudiziu è impedisce a surviglianza necessaria di pettu à tutti i risichi di sparghjera pupulista o razzista chì sò u fattu di a stretta dritta.

1 Era cusì inde l'anni 80-90, à l'epica induva Le Pen era intardettu di meeting è ancu d'attaraghju in Corsica.

2 Si pò pinsà à u stràviiu fascistu in nome di a dimarchja irredentista di numerosi scrivani è pueti corsi scritti ingrentu à a dinamica di a Muvra di P. Roca.

Una memoria mozza hè dinò una pussibilità data à u partitu attuale di a Corsica Francese è Ripublicana, sia i Melenchonisti, sia i clanisti di l'altri partiti, pà attribuisce à u movimentu naziunale une poche di visione pulitiche limitate ch'ùn rendenu micca contu di a so diversità ne mancu di a so capacità à costruisce un prughettu dimocraticu di progressu.

Hè vera chì inde l'anni 80 è 90, Le Pen hè statu intardettu di Corsica par via di e mobulizzazione di una parte di u movimentu naziunale. Ma stu fattu ùn garantisce nulla pà ciò chì tocca à a situazione d'oghje è ùn da nisuna spiecazione cumplessiva nant'à d'altri elementi di a situazione passata.

Par asempiu, ùn si ramenta omu mai chì u FN hà cu- gestitu l'Assemblea di Corsica cù u RPR, prova ch'ella hè stata à dighjà permeabile a nostra sucetà à e tesi di stretta dritta.

Questu fattu u spiecanu i rispunsèvuli nazionalisti dicendu ch'ella hè a presenza di forze strangere opposte à a lotta di u populu corsu à l'origine di tuttu. Un pò esse ritinutu st'ultimu argumentu postu ch'ellu ùn esiste nisun studiu fundatu nant'à i cumpurtamenti allitturali in leia cù l'origine di quelli chì votanu. Ùn hà cà un'ipotesa prupagandista. Ma permette à quelli chì si ne servenu di pratende chì quelli chì votanu FN ùn ponu esse cunsidarati cum'è Corsi ma pìutostu cum'è sustegni di u partitu francese.

Tandu sò prisintati da rispunsèvuli i scagni di votu vicin'à e caserne o lochi chì cuncentranu numarosi rimpatriati d'Àfrica di u Nordu. Purtantu, sò belle poche e caserne inde i carrughji populari o inde e zone rurale ciò chì mostra bè quant'ella hè falsa sta teuria. U livellu di e vutazione arrigistrate da a stretta dritta luntanu da tutte e zone chì cuncentranu pupulazione « pedi nere » indetta dinò ch'ellu hè sbagliatu l'argumentu di un votu « cumunitaristu ».

Tandu ùn si face micca contu di tutte e discussioni ingrentu à u movimentu naziunale. Certi ùn cercanu mancu à piattà ch'elli ricusanu à i ghjughjiticcii u drittu d'avè a so piazza in terra corsa. Li ricusanu ancu a pussibilità d'esse citatini di pienu drittu. Stu ricusu vale sopra tuttu pà i Maruccani, Tunisiani è Algeriani è si fonda nant'à l'affermazione chì sti populi ùn ponu scumparte una citadinanza cumuna, cù a cumunità « storica » di fede cristiana è di ceppu aurupeu, u Populu corsu. Vale à di chì l'Àrabu ùn pò anda insieme cù l'Aurupeu cristianu postu chì a so riligione è u so modu di campà ripresentanu guasi un pìriculu. I stessi Le Penisti a si pensanu cusi.

Si e sfarente direzione chì anu gestitu u movimentu naziunale pinsavanu di tene à frenu cusi l'idee senofobe di una bella parte di i militanti di basa, fendu di u votu FN un votu « francese », si pò dì ch'ellu hè statu un sbagliu di quelli s'omu piglia in contu u clima attuale, argumentu ch'ùn tene manc' appena cù e nove generazioni.

S'omu cunsidareghja u passatu sia vicinu, sia luntanu, si pò rimarcà chì e risposte date da i rispunsèvuli nazionalisti sò state spessu imprecise, incerte, vaghe o ancu false in tuttu.

S'ellu si pò sempre scambià sensu, ci tocca à chjarificà è à dibatte à spiccherà nant'à ste tematiche di primura.

## **E migrazione, un pìriculu pà a Corsica ?**

Numarosi Corsi sprimanu oghje un pinseru identitariu più o menu rivendicatu.

St'angoscia nasce di l'impressione di sparisce è di ùn esse più cà u nulla. Inde un mondu ammaestratu da l'ecunomia di mercatu, si sente omu spanticatu è rinviatu à una dimensione individuale chì impedisce l'andatura è a mossa cullettiva.

L'ideologia liberale strughje l'esse cullettivu è u rimpiazza cù a somma di l'individualità. Sta cundizione hè una di quelle chì permettenu a priputenza di stu modu di funzionamentu ecunomicu, sociale è culturale.

## **S'omu vole, omu pò**

Sta divisa aduprata oghje più cà mai da i prupagandisti di l'ideologia liberale (media, « novi filosoffi », istituzione, omi pulitichi) hè in leia diretta cù « the american way of life », modu di campà di a citadella capitalista di i Stati Uniti d'America, modu di campà chì ripresenta dipoi anni è anni una duttrina à livellu mondiale.

## **L'arma di a paura**

Pà impone sta duttrina, à st'imperialisimu l'hè toccu à ghjuvà si di tutte e so arme.

E violenze generalizzate di l'ultimi cunflitti mundiali à l'origine di cunflitti detti localu ùn sò cà prove pà rigulà cuntradizione proprie à u sistema capitalistu o pà spantì tutte e forme d'alternative à stu sistema. I danni è i disgrasti sò seguitati da ricustruzione eppò da ritorni versu novi cunflitti cum'è ingrentu à un chjerchju infemale. Stu mondu d'incertezza fonda a logica di l'ecunomia di marcatu. Ghjè par quessa chì a prupaganda, dunque l'arrulamentu glubale serve à cuntrullà è à inquadrà. Unu di l'effetti secundarii patuti hè a paura. Quand'ella ùn nasce micca « da par ella » à livellu individuale, li tocca tandu à fà la nasce à livellu cullettivu, di modu generalizatu. Hè cusi ch'ellu si passa cù un sughjettu d'attualità : e migrazione di pupulazione vinute da territorii tocchi da cunflitti armati o arruinati da crise ecunomiche o climatiche.

L'immagine d'infilarate di zitelli donne è omi in marchja versu l'Europa sò trasmesse à rombu d'emissione. U sensazionale vince u restu. Impone l'idea di un' « invasione » chì parmette tutti i fantasimi senofubi è face dunque nasce a paura.

## **A custruzione di u ricusu**

U disimpiegatu hè inchietu di vede simula scalata di migranti forse vinuti da arruinà e poche pussibilità soie di ritruvà un impiegu. U citatinu teme ch'ella nasci l'insicurità urbana da a crescita di sti circataghji senza tettu. Quelli chì campa inde una zona periurbana, ingrentu à un luttisciamentu crede ch'elli minaccinu i so averi sti novi periculi. L'alettu locale teme a riazione di i so amministrati è ch'ellu ùn sia più vutatu tandu. U paisanu chì si ne sta in campagna teme pà u so modu di campà , pà i so « habitus ». À u catolicu praticante ùn li cunvene forse chì e so cridenze possu cuabità cù una riligione concorrente.

L'omu corsu hè invitatu à teme tuttu què cù in oltre a paura di a so propria sparizione cum'è populu.

Quand'ellu marchja bè l'arrulamentu ideologicu, nascenu e riazione poche poche raghjunevule.

Ghjè di stu mischju trà rialità oghjinche (disimpiegu, crescita di una povartà generalizata, inflazione, spantichera di i fundamenti culturali, mudifiche di i lochi è spazi di campà) è paure fantasimate (cumunitarisimu, culunizzazione di pupulamentu di massa, islamizzazione di a sucetà, sparizione di u populu corsu) ch'elli nascenu i periculi più tremendi.

## **E midicine.**

Ancu s'elle parenu bè disposte, e chjame chì si fondu nant'à un'andatura « umanista » è basta s'indibbuliscenu di pettu à e prublematiche, e primure attuale.

I puntelli maiò ch'elli ripresentanu un'ideologia (ch'un dice u so nome) è a so prupaganda parmettenu di sottumette a maiurità à un mudellu ecunomicu, suciale è culturale prisintatu cum'è solu capace di risponde à i bisogni di l'Umanità.

Per forza o per amore, femu parte di ciò ch'omu chjama l'Uccidente ecunomicu è giupuliticu. St'arradichera hè nata da una sèguita di circostanze. St'Uccidente si trova in cuncurrenza diretta cù d'altre aghje ecunomiche. Fraza materie prime ch'elle manchinu o nò nant'à u cuntinente aurupeu, da cuntintà i so bisogni proprii.

E so produzzione ùn sò micca compre da u so marcatu interiore stessu. Ingreto à stu marcatu, e ricchezze prudutte sia da l'ecunomia pruduttiva è marcante, sia da l'ecunomia spiculativa di u mondu di a finanza si sparghenu di modu sempre più sparv, inuguale. A so crescita demografica<sup>3</sup> ferma assai più debbule cà quella di l'Asia o di l'Africa. Ancu s'ella ùn hè chjaramente rimessa in causa, a so suprana smarisce pianu pianu per via di l'accuncere nove nate da a mundialisazione economica.

Ùn hè micca un «scontru di civilizzazione » ch'ella pate l'Umanità ma solu adattamenti o ritocche specifiche à u sistema capitalistu. Hè cusì ch'elle si sprimanu e mute di i « centri » è di e « periferie » seguitendu i scunvuglianti economici.

U populu corsu intesu cum'è parte di st'Umanità hè direttamente toccu da stu cuntestu pricisu. Hè toccu cum'è parte spugliata da i so dritti è rivendicazione è spostu à scelte di primura pà u so avvene.

Pò sceglie di mantene si cum'è parte di a Ripublica francese (sott' à a forma attuale o ancu sott' à un regime d'autonomia limitata). Tandù, hè ligatu cù e pulitiche di u Statu è cù tutte e so cunseguenze.

Pò dinò scumette nant' à l'idea di una supra nazionalità auruepa è decide sicondu intaresi di classa, di fà parte di u marcatu unicu. Li tuccherà dunque à apittà si a rispunsabilità di l'effetti interni è sterni ch'elle avaranu ste pulitiche auruepe.

Pò ancu fà a scelta, s'ella si sprima una vulintà pulitica, di un prucessu d'autodeterminazione è decide di un modu di sviluppu è di una pulitica esterna, sciogliendu e so alleanze è tutte l'altre forme di rilazione ch'ellu conta di mette in ballu cù u so spaziu vicinu (e duie sponde di u Mediterraniu) o più luntanu.

Ste pruspette ponenu a quistione di a citadinanza è a citadinanza cumporta quella di a scelta di sucetà. Ùn vole di ch'ellu ci tocchi à lascià da cantu i dibattiti o e lotte in u cuntestu di u sistema attuale.

A crisa tremenda chè no patemu, ancu s'elle esistenu di tantu in tantu une poche di calmate, pò sbucà nant' à duie scelte opposte in tuttu

Sia a tafalera versu un mudellu puliticu pirculosu, mischiu di pupulisimu è di putere autoritariu à l'origine di tutte e forme di sclosure, sia un mudellu fundatu nant' à a ricerca di a parità è a ghjustizia suciale, mudellu chì piglii in contu a nomicizia di classa.

Cumbatte oghje u razzisimu è a sinufubia, ùn hè micca sparmià si altri cumbatti contr' à tutte e forme di sclosure o d'alienazione.

Mubilizà si pà un'infurmazione chì sia pluralista, ghjè mandà à i furni a suprana di i media è di uni pochi da capifinanza. Ghjè dunque vulè un serviziu publicu d'infurmazione cù d'altri medii autogestiti.

Appruntà l'avvene, ghjè ricche un sistema educativu di gratisi, apartu à tutti è fundatu nant' à una pedagogia chì sia in capacità di fà nasce citadini libari di pinsà l'alternative.

Custruisce un' avvene, ghjè abulisce a pricarità, l'inghjustizia suciale è tutte e sparità chì parmettenu a crescita di u numeru di i razzionarii.

E medicine sò di gèneri sfarenti, cù scopi diversi è varii ma tutti in busca di un prughjettu d'emancipazione.

Ghjè par quessa chì a Manca vi chjama à participà à i dibattiti nant' à u tema :

« JUS SOLI, JUS SANGUINIS, JUS CIVITATIS, JUS SUDORIS ».

## II ) I fundamenti di una cittadinanza corsa

E nuzione di drittu nate inde l'Antichità sò conquiste di un'Umanità in busca di progressi. À ste nuzione ci facianu rifarenza i currenti rivuluzionarii, ancu quelli di Corsica. Ma da un territoriu à l'altu, da un periodu à l'altu, e parolle è nuzione ligate à a cittadinanza ùn anu listessu significatu. Quand'omu si definisce cum'è un patriotu corsu, omu hè rinviatu à a l'ascita latina è à sta rilazione specifica à un territoriu è à tutti ciò ch'ellu pò riprisintà. In Francia, a parolla patriotu hè divintata una nuzione defensiva in leia cù a nazione è tocca sopra tuttu a dritta è a strema dritta nazionale. Ci primureghja dunque ch'elli sianu definiti di modu pricisu l'elementi di drittu chì custituiscenu una cittadinanza corsa. Ch'elli sparischinu i sbagli è i schemi impurtati o riazzunàrii.

Si deve pudè fà l'invintariu di ste nuzione inde a sucetà corsa di u XXlesimu seculu. Sottumette a cittadinanza corsa à u principiu di « Naziunali » intesu cum'è in u XVIIIlesimu seculu, ghjè fà un'anacronisimu cumpletu ch'ùn si pò accità. Òn corrisponde più à ciò ch'elle sò e cumunità agrupasturale corse spanticate da u culonialisimu, ma in oltre, a pupulazione corsa hà mutatu assai assai. Ci tocca dunque à truvà un'equilibriu trà a l'ascita pluriseculare di a nostra rilazione à u spaziu è u bisognu d'adattà si à e mute suciale oghjinche. À dilla franca è chjara, sti dibattiti ùn sò nati d'oghje è hè ora di riattualizà principii di cittadinanza cunsidarati dighjà cum'è progressisti tant'anni fà.

### **JUS SOLI, Drittu di a tarra**

Inde i modi d'organisazione pulitichi è suciali i più vicini à livellu storicu è socio-culturale à a nostra sucetà corsa, sò senza cuntestu e pruduzione di u drittu rumanu anticu chì fissanu fundamenti sempre d'attualità.

Ogni cristianu vole prufittà di un spaziu ch'ellu acconcia in un territoriu <sup>4</sup> pà stabbilisce pà sempre o pà un tempu i so prughjetti è e so attività. U drittu rumanu di a tarra permette à ogni parsona stallata nant'à u territoriu di Roma di pudè si identificà è ancu stabbilisce inghjiocu inde l'Imperu, sendu citatinu rumanu. Quali sianu i mutivi di stu progressu chì accade incù l'Edittu di Caracalla in 212 dopu à Cristu, bisognu à capisce stu « jus soli » cum'è un drittu di a tarra chì s'oppone à una manera autoritaria di definisce quale hè citatinu.

4 Ghjè l'effettu di l'accuncera umana (anthropisation) chjamata oghje da i giuraffi accuncera di u territoriu.



Inde stu cuntestu, chì mette a priori, à parità ogni parsona chì s'identificheghja à u prughjettu puliticu di Roma, l'origine etnica o culturale ùn conta più micca in teuria pà diventà citatinu. Sfarenti imperatori, ch'ùn eranu nati inde u Lazio, anu ammaestrau dopu l'Imperu. In oltre, inde una sucetà rumana assai spara, ancu i schjavi affrancati pudianu gode di l'inseme di i dritti di a citadinanza rumana. Si pò indittà chì à partè si da l'Imperatore Claudiu (41- 54) è da i Julii-Claudian, prima di e dinastie imperiale maiò, st'affrancati stessi ripresentanu battaglioni d'alti funziunarii capi di sirvizzii amministrativi sani, de facto ministri nanz 'à l'ora è capi d'importantissimi scagni.<sup>5</sup>

À dilla franca è chjara, quellu chì sta inde un territoriu induv'ellu si costruisce un prughjettu puliticu cumunu è chì si ricunnosce inde stu prughjettu hè un citatinu di pienu drittu. Vale à di ch'ella hè tandu cunsiderata senza anacrunisimu a « res publica » è ancu u bè cumunu. Quandu u movimentu naziunale corsu hà messu in ballu a nuzione di « cumunità di destinù » in 1988, s'hè piazzatu de facto in a cuntinuità di u drittu di a tarra cuncipitu duie milla anni fà.

Dipoi tandu, u drittu di a tarra hà cunnisciutu numarose interpretazione è definizione sicondu e mute di i Stati-Nazione muderni. S'hè vista par asempiu inde u drittu burghese, fundatu nant' à l'articulu 17 di a Dichjarazione di i Dritti di l'Omi è di u Citatinu di u 26 d'aostu di u 1789,<sup>6</sup> una leia stabbilita trà drittu di a tarra è drittu di pruprietà.

Ponu nasce tandu dibattiti nant' à i prughjetti di sucetà, ma a nuzione di drittu di a tarra ligata à a cumunità di destinù deve firmà una nuzione fundamentale à l'origine di a definizione di a citadinanza corsa.

Hè dinò corsu quellu o quella chì vole ch'ellu sia costruitu un avvene naziunale corsu, senza primurà si di l'origine, di e cridenze ne mancu di i cuntesti istituzionali.

5 I cugnomi di Pallas, Callistu, Polibiu è Narcissu sò firmati famosi. Sta scelta hà parrmessu à l'Imperatore di fà sminuisce l'influenza di l'omi libari. L'affrancati gestiscenu tandu i scagni palatini di Roma, spezie di « ministeri » : a currispundenza, l'inchieste, e richeste, l'archivi è i conti ; inde e province, surveglianu e pruprietà imperiale è e finanze, ma sott' à l'ordine di cavalieri; cuntrollianu una parte di e ricette (imposti indiretti) è a maiò parte di e spese publiche (armata, aquidotti, granu) è private (palazzi è evergetisimu : travagli publichi, spittaculi, bibbiuteche) ; cf « Schjavi è affrancati imperiali » in Universalis

6 Art. 17. « inviolable et sacré, nul ne peut en être privé, si ce n'est lorsque la nécessité publique, légalement constatée, l'exige évidemment, et sous la condition d'une juste et préalable indemnité ».



## JUS SANGUINIS, Drittu di u sangue

Sta nuzione di drittu corrisponde à u pussessu di a citadinanza sicondu una logica di leghjittimità data da a figliazione. Ma ciò chì fonda a figliazione pò mutà assai assai trà un periodu è l'altu, trà un paese è l'altu, ancu corrisponde à principii opposti di citadinanza.

À principiu, a nuzione romana di « drittu d'origine » rindia pussibile ch'ella sia trasmessa a citadinanza à i discendenti senza cunsidarà u locu di nascita. Si vede tandu chì dipoi l'origine, stu drittu di trasmissione hè ligatu senza opponesi à u drittu di a terra. Sta nuzione romana aghjusta un modu d'accessu à a citadinanza ma ùn ne caccia micca.

Sott'à u regnu di Napulione, sta nuzione appiecata à e donne hè stata ligata da u codice civile à u matrimoniu, ciò chì hà fattu nasce situazione incredibile. Hè cusì chì parechje decine di milaie di donne francese (ancu certe vinute da vechje famiglie di u paese) sò diventate stranghjere semplicemente parch'elle si sò maritate cù un strangjeru.

Ghjè inde a mità di u XIXesimu seculu, cù a nascita di e teurie razziale in leia cù u sviluppu di u Darwinisimu sociale,<sup>7</sup> chì u drittu di u sangue hè statu sottumessu à una visione etnicista è razziale da certi currenti. L'invenzione di false razze umane (bianca, gialla, rossa è nera), invenzione corrente inde l'enciclopedia eppò inde i libri sculari di tandu, parmittia di ghjustificà a missione civilisatrice di a detta « razza bianca » di pettu à l'altri populi culunizati, ghjudicati inferiori sicondu elementi biologichi pochi stabbilli.

Pà i primi ideologichi razzisti, a classificazione biologica di i populi nazionali da à u drittu di u sangue una dimensione razzalista: vale à di ch'ellu hè citatinu quellu chì hè isciutu da l'etnia territoriale.

Ghjè u nazisimu<sup>8</sup> chì hà datu a so forma finale à l'ideologia criminale di a purezza di u sangue intesa cum'è elementu di valutazione di u livellu di citadinanza. I so eredi ideologichi in Corsica provanu d'oppone una cumunità storica di sangue dettu schiettu à a cumunità di destinu. Omu si ghjova dighjà di a parolla « mischiati » o « razzoni », sti sangui mischiati, chì ùn sarianu veri corsi. Sta ghjerarchizzazione ramenta e lege hitlerina cum'è quella di Nuremberg in 1935 nant'à a purezza di u sangue alimanu.

L'andatura ideologica di a nazione corsa s'ella s'ingagia inde stu mudellu razzistu hè pussibile s'omu ghjustificheghja l'appartinenza à un'etnia territoriale arribèndu si à una casata. Sta dimarchja hè ricusata senza dubbitu alcinu da i mezi muderni di l'antrupologia biologica.

Ancu si no trovavamu cù l'ADN un Haplogruppu ADN maiuritariu in Corsica, ùn saria micca specificu à a Corsica ma mustriaria chì una casata ùn hè micca sempre in leia cù un'origine giugrafica.

7 U Darwinisimu sociale, sopra tuttu purtatu da l'ideologu Herbert Spencer, hè un'appiecazione meccanica inde u duminiu sociale è di e scienze umane di e teurie darwiniane nant'à l'evuluzione è a selezione naturale (adattazione di e spezie sicondu e cundizione di vita di e spezie e più adattate). Sta duttrina pulitica evuluzionista nata in u XIXesimu seculu cunsidaraghja dunque chì a lotta pà campà trà l'omi ripresenta u statu naturale di e rilazione sociale. A so azione pulitica cerca à abulisce tutte l'istituzione chì volenu impedisce a sprissione di a lotta pà campà è di a selezione naturale (sò abulite emisure di prutezzione sociale, e lege nant'à i poveri).

8 I Nazi ricercanu tandu l'« anyanisation » di i territorii conquistati da elli chì formanu un spaziu capace à assicurà u campà pà s'ariani fantasmati.



Pà puntà stu deliriu criminale sin'à l'ultimu, mittemu chi l'Haplogruppu d'Otzi, sia ritinutu cum'è un indiziu geneticu di a purezza di u sangue corsu. Stu fatu indittaria chi u prughjettu di i razzisti corsi saria di vede u populu corsu bellu riduttu à livellu demograficu da a cunsanguinità. U prughjettu di i razzisti corsi hè di trasformà u populu corsu in una pupulazione macagnata à livellu biologicu. Stu mitu di u « sangue corsu » hè à tempu ridiculu è pirculosu.

S'ella ùn s'opponu micca cù u drittu di a tarra è s'ella ùn mette micca in opara principii razzisti o etnicisti, sta nuzione di drittu di citadinanza par via di a filiazione ùn hè tantu pirculosa. A contrario, si deve cumbatte di modu sistematicu è chjaru a propaganda sviluppata in giru à l'idea di « sangue corsu » vistu cum'è principiu di nazionalità.

## JUS CIVITATIS, Drittu di citadinanza.

Dipoi l'Antichità romana, u Jus Civitatis vole di pà un omu gode u drittu di cità, vale à di esse sottumessu à i stessi dritti (esse alittore, esse alettù, fà apel di e decisione ghjudiziarie, etc...) è duveri civichi (esse recensatu, fà parte di un'armata, pagà l'impositu etc...) cà l'altri citadini membri di a stessa cità o di u stessu populu. Un citatinu face parte di una cumunità gestita da regule. À livellu ideologicu, gode u drittu di cità da dinò una leghjittimità « patriotica » à quellu chì u pussee. Sta leghjittimità si sprima inde u drittu à purtà l'arme in difesa di a Cità.

A citadinanza è a nuzione muderna di naziunalità ùn si mischianu micca sempre. Par asempiu, dipoi u trattatu di Maastricht di 1992, hè citatinu aurupeu quellu chì hà a naziunalità di un Statu membru di l'Unione aurupea. Vale à di chi e parsoni chi si ricunnoscenu inde e Nazione senza statu ùn ponu avè accessu à a citadinanza aurupea. Di modu concretu, un Corsu ùn hè aurupeu cà in nome di u so statutu di citatinu di u Statu francese. Sicondu i Stati, e visione di a citadinanza sò dinò abbastanza varie. Cusi, in i Stati Uniti, i membri di u Commonwealth ricevenu u benefiziu di una citadinanza parziale senza a naziunalità. A contrario, i citadini di u Statu spagnolu ponu esse di naziunalità catalana (Statutu di 2006).

In Francia, a citadinanza hè una tematica carca à ideologia dipoi a Rivuluzione francese. S'organizeghja in giru à un prughjettu puliticu chi custruisce a Nazione francese.<sup>9</sup> A Custituzione di u 1958 ramenta inde u so articulu 1ma, a nuzione di « Repubblica Indivisibile » chì mette da cantu a nuzione di nazione o di populu, sia brittonu, bascu o par ciò chì ci tocca, corsu. In oltre, inde l'articulu 2 di a stessa Custituzione, u principiu « a lingua di a Repubblica hè u Francese » pruibisce de facto l'usu ufficiale di e lingue dette regiunale (tutte fora di u Francese).

9 Colette Beaune, Naissance de la nation France, Paris, Gallimard, coll. « Bibliothèque des histoires », 1985.  
S'opara di primura pà a capiscitura di sta custruzione ideologica dice chì a Francia ùn s'hè fatta in una ghjurnata. Sta custruzione hè durata seculi e seculi. Sta Nazione Francia s'hè fatta pocu à pocu, à pezzi è à buccu, una cunquista dop'à l'altre, à mezu à ribulioni dinas tichi. Hè nata da a sparghiera di un sintimu nazionale chì s'hè rinforzatu in tempu di Rivuluzione francese.



Cum'è no l'avemu detta inde l'introu di sta siconda parte, ci tocca à tene contu di i raporti di forza attuali è sopra tuttu di l'evuluzione di a sucetà corsa pà appicà certi trà sti principii di citatinanza in Corsica. A vulintà individuale d'esercità una citatinanza corsa s'arremba nant' à una scelta leghjittima ma illegale di pettu à u drittu francese è aurupeu oghje in pratica.

U dibattitu nant' à a citatinanza è a naziunalità chè no pruvemu à defin hè più cà di primura. Pudemu ripiglià à contu nostru l'assuciazione trà naziunalità è citatinanza francese pà custruisce un mudellu propiu chì rimetti in causa e nostre tradizione ligate à « l'ospitalità » ? Ci pudaremu inde una Corsica autonoma o indipendente ghjuvà di una citatinanza corsa di naziunalità francese, taliana o maruccana ? À contu nostru, cum'è internaziunalisti, citatini di u mondu, si pò chjaramente risponde di sì.

Quellu o quella chì partecipeghja à a vita di a cità si deve pudè ghjuvà di i dritti civichi, fora di i prupietarii di residenze sicundarie, à l'origine di a spiculazione immobiliare (è dunque rispunsèvuli diretti di a crescita di e pigjiò è di u prezzu di a terra) è di i membri di e forze armate stranghjere (armata, pulizza). A so missione inde u territoriu hè d'esercità un cuntrollu chì aliena o d'avè un'azione cuercitiva nant' à u dettu territoriu. Nous voyons mal un colon se reconnaître à titre individuel dans la citoyenneté corse, de par sa nature politique même de colon.

Un'origine, ùn pò esse un'idea o una scelta. I residenti corsi ùn si ponu cunsidarà da un puntu di vista etnicu. S'agisce tandu d'appartenenza à cumunità fantasimate. Devenu esse piutostu cunsidarati cum'è parsoni di pienu drittu in brama o micca di participà di modu libaru à l'emancipazione di u populu corsu inde tutti i duminii pussibili.

Ramintémuci chì a Corsica sta à u crucivia di duie sfere giupulitiche : un' Uccidente in u nordu chì tene un'influenza culturale è spirituale pripotentente nant' à u nostru territoriu è u Mediterraniu, stu « mare nostrum » pluriculturalechì ripresenta a nostra aghja geografica. A sola alternativa à a barbaria hè di prupone una sintès di st'influenze varie fendu un citatinu à l'identità pluriculturale complessa.

Più cà l'origine, ghjè l'adesione à una visione di a cità fundata nant' à l'intaresu generale di a Corsica, nant' à una cultura corsa in movimentu è muta cuntinua (trà tradizione è mudernità) è/ o nant' à un prughjettu naziunale corsu, chì deve esse u puntellu di una citatinanza aparta nant' à u mondu in Corsica. Esercità sta citatinanza di pienu drittu cagiona ch'ellu sia prumossu u civisimu. Sta nuzione si capisce cum'è un'educazione à a citatinanza (ch'ùn corrisponde manc'appena à un'valore razzianariu) ma chì porta un altu livellu di cuscenza di i dritti è di i duveri d'ognunu di pettu à a cumunità .

## JUS SUDORIS, Drittu di u sudore.

D'Aristotele sin'à Santu Tumasgiu d'Aquino, passendu pà Cicerone, u Jus Sudoris hè statu ughjettu di dibattiti. Pà principià, i primi citatini anu stabilitu e Ripubliche in nome di u Bè cumunu.<sup>10</sup> Stu scopu l'hà datu a vulintà di ingaggià ci una parte di a ricchezza pruduta da u so travagliu. Ognunu sceglie di sustene un'azione specifica à u serviziu di tutti: stu drittu hè statu chjamatu Jus Sudoris. Sta nuzione cagione a quistione di a difesa di u bè publicu è di l'intaresu generale par via di a pratica citatina.

S'ella dipende a ricerca di u Bè cumunu da a capacità di u citatinu à ingaggià ci una parte di e ricchezze ch'ellu prудuce, tandu, più u citatinu hè ricu, più pò intarvene cum'è li pare nant'à l'organisationsione di u bè publicu. De facto nasce una sparità di i dritti inde a pratica di a citatinità, sparità in leia cù a pusizione suciale. Inde a Roma antica, à l'origine, i Patriziani (sciuti da l'anziana nublità custituita da e famiglie più antiche di a Roma reale è ripublicana, nublità à spessu custitutiva di a casta riligiosa) avianu più putere cà i plebeiani par via di u so statutu ghjuridicu, economicu è suciale. E famiglie plebeiane eranu dipendente da e patriziane è formavanu parte di a so clientela. U clientelismu hè un sistema di sottomissione pulitica, economica è suciale patuta da certi citatini à prufittu d'altri citatini. Stu sistema rimette in causa u principiu di una citatinità para è arruina u Jus Sudoris.

Ancu s'ellu cunserva u so drittu di votu u citatinu, l'appiecazione di i so desiderii pà l'intaresu generale ùn si pò guarantisce. Hè sicondu ciò ch'ellu dice o sprima u votu di e scelte di i citatini. Tandu hè postu u prublema di l'organisationsione di u putere dimucratu. U mondu di u travagliu (a cumunità di quelli chì sudanu) ancu s'ellu hè maiuritariu inde e sucetà umane,<sup>11</sup> ùn vede micca a so scelta pulitica concretizata in azione. Dui elementi spiecanu stu putsch dimucratu permanente: a professionalisatione pluriseculare di a pulitica da carrieristi sciuti da classe favurizate è u pocu cuntrollu cullettivu nant'à i mandati di l'aletti. Quand i l'aletti ùn anu nisun contu à rende à i so allittori è tradiscenu tandu i programmi chì l'anu fattu eleghe, ùn semu più in dimucrazia ma puru inde un'oligarchia.

A Corsica ùn hè sfarente da l'altri territorii. Cresce sempre di più a pricarità di citatini chì sò sempre menu ripresentati. Peghju, soli i capitalisti è i picculi patroni sò cunsidarati cum'è socioprofessionali. A maiò parte di u populu corsu, sciutu da u salariatu è da a classe di i travagliadori indipendenti, ùn hè cunsidarata cum'è fatta di professionisti di a sucetà. Sò dunque citatini di pocu valore è pocu impreme u so parè. Allora, u Jus Sudoris, drittu di u mondu di u travagliu à esercità di pienu drittu a so citatinità, ùn esiste più, hè nigatu. Pà i burghesi, u bè cumunu in Corsica dipende di l'adesione à un liberalismu glubalizatu, à un « totalitarismu », à i supermercati è à u B.T.P.

Sta visione abbastanza particolare di u bè cumunu ùn ghjova cà pà sudisfà l'intaresi di una minorità fendu cresce di manera tremenda e sparità trà Corsi.

A parità citatina è dimucratu ferma un scopu maiò da rializà in Corsica, cum'è in tempu di a Ripublica paolina in 1755. Sicondu l'andatura di e Cunsulte, solu un sistema di contra puteri è di cunsulte era in capacità di rimette in causa u clientelismu è a professionalisatione di l'attori di a vita pulitica.

U citatinu corsu si deve dunque vede garantita a suvrànità pupulare sciuta da u numaru più maiò par via di ariresi pricisi.

Ùn vulemu più oligarchia in Corsica ma bramemu d'esse citatini corsi pari in drittu.

10 Res Publica vole di, ramintèmicu lu a « cosa publica », vale à di « l'affare di tutti ». Ghjè cusi ch'ellu si capisce ciò ch'omu chjamal'affari publichi. Par ciò chì tocca à u Bè Cumunu, s'agisce di una nuzione cunnisciuta da a filusuffia antica, sopra tuttu quella d'Aristotele.

11 Hè dunque par quessa ch'ellu s'adopra a sprissione latina di « proletarii », vale à di quelli chì anu discendenti numarosi (rifarenza à stu numaru par via di un altu tassu di natalità inde e sucetà anziane)

### III ) Definizione di una cittadinanza corsa di progresso

A definizione di una cittadinanza corsa di u XXImu seculu ùn pò esse u ripigliu di a spirienza di u 1755 par asempiu o un risultatu di l'epica coloniale. Trà tradizione è modernità, aparta nant'à u mondu, li tocca à tene contu di e cundizione storiche oghjinche cum'è di e brame di u mondu di u travagliu corsu oghje chì ghjè oghje. Si deve dinò strutturà in giru à un prugettu di sucetà cù regule chjare è armesi pricisi.

A sola cumunità di drittu leghjittima nant'à l'isula hè ghjustu à puntu l'inseme di e parsons qual sia a so nazionalità, chì si ricunnosce inde a cittadinanza corsa.

Nisuna altra cumunità fundata nant'à cridenze o brame parsunale ùn pò pratende à mischjà si o interpone si inde e scelte o inde a vita dimucrativa di u populu corsu. A cittadinanza corsa ùn v'è senza un prugettu di sucetà laicu.

Ramintèmu ci bè, ancu si certi provanu à fà la crede, chì a laicità ùn hè micca u fattu d'esse neutru à livellu rilighiosu postu chì a « neutralità rilighiosa » ùn vole di nulla è ùn esiste micca ! A laicità ghjè un principiu chì cerca à impedisce tutte e forme di pruselisimu chì minaccianu inde i lochi publichi a parità in drittu di tutti i citatini. Ghjè par quessa ch'ellu s'agisce piuttosto di a neutralizzazione in azione di a quistione rilighiosa ingrentu à un spaziu publicu da garantisce e cundizione di un campà inseme chì sia da veru dimucratu.

A laicità permette à ogni citatinu corsu d'esercità e so libartà civiche in u rispettu di l'upinione è di e cridenze d'ognunu. Tandù, cusì, ogni cridenza o sensibilità d'ordine spirituale hè un drittu fundamintale di a parsona chì si deve ristringhe o circunscrive à u duminiu privatu. Tutte e strutture publiche è l'agenti publichi finanziati da cuntribuzione pagate da l'inseme di i citatini corsi devenu garantisce una parità d'accoglienza è di trattamentu à tutti senza cunsidarazione d'origine, d'upinione o di cridenza. Tandù, diventa pussibile a neutralizzazione di e cridenze parsunale è nimu ùn pò pate nè discriminazione, nè esibizione di cenni chì possinu scumudà.

À contu nostru, assicurà a suveranità pupulare sottintende è cuntene un prugettu di sucetà fundatu nant'à un mudellu di dimucrazia autogestiuaria.

Esercità u so drittu di vutà hè un elementu di primura chì custituisce a cittadinanza. Ma ùn hè micca u solu è ancu menu u solu chì vali.

Si deve arrimbà a cittadinanza nant'à un inseme di dritti, elli stessi cuncipiti è appicati inde un cuntestu di dimucrazia autogestiuaria. Sta dimucrazia ripresenta a sprissione a più dimucrativa di a vulintà pupulare chì si possi manifestà à tutte e scale, sia in cità, in campagna o in u mondu periurbanu chì nasce pianu pianu, sia inde l'imprese di statutu privatu o inde tutti i servizii publichi.

S'arremba sta dimucrazia autogestiuaria nant'à u principiu di l'auto urganisazione.<sup>12</sup> Vale à di chì a pratica di a cittadinanza hè fundata nant'à un cuncipimentu chì cunsidareghja a realtà cum'è una "pluralità" di regule pulitiche, sindacale, spirituale o culturale, micca reduttibile à una più profunda unità.

In oltre, i lochi induv'ella si decide è appieca a suveranità pupulare sò sottumessi à e regule di a dimucrazia diretta. A dimucrazia diretta hè à tempu un cuncipimentu è una pratica cuntinua. Fissa u cuntinutu di i mandati alettivi è quant'elli duranu. Si sprime dinò par via di u drittu di manifestà, u drittu di greva, d'organizà un referendum, u drittu d'accessu à i mèdia o u drittu di veto.

12 S'agisce qui di un prucessu, una dimarchja permanente induv'ella s'appfundisce, cresce e si migliureghja l'organisazione interna di un sistema senza ch'ella sia gestita da un'origine à tempu sterna è superiore à l'inseme urganizatu.

A dimucrazia autogestiuaria ripresenta à tempu un spaziu di decisione è ancu un puntellu induva si definisce è si permette l'eserciziu di e libartà individuale è cullette. Ghjè a lege chì garantisce ste libartà.

E lege sò risultati di raporti di forza sociali in un tempu è un locu assignalatu. Ste lege stesse facenu di l'affirmazione, a prumuzione è a difesa di i dritti di a zitellina, di a donna è di l'omu uni pochi d'elementi inalienevoli à un putere economicu, religiosu o à quellu di un partitu unicu.

Ma, cum'è prudutti di raporti di forza, sò par via di a so natura stessa varievoli è micca invariabili. Ci primureghja dunque di ramintà a sfarenza trà legalità è leghjittimità chì ogni citatinu l'abbii in mente. Ghjè sta sfarenza stessa chì rende leghjittimu u duvere di rivolta<sup>13</sup> inde una sucetà dimucratca è a disubbidienza civile cuncipita da Thoreau in 1849.

Inde a citatinanza chì no vulemu prumove, a parità trà omi è donne ùn pò firmà una teuria.

Ci tocca à ramintà ci chì u drittu di e donne à riceve un trattamentu economicu è sociale parà à quellu di l'omi hè sempre nigatu oghjè chì ghjè oghjè in u 2017. Senza parità trà omi è donne campata è praticata in situ, ùn ci ne hè dimucrazia. Stu bilanciu par noi ùn si pò accittà è ci tocca à rilancià i cumbatti ogni tantu ch'ella si face ghjurnu l'occasione. In u settore privatu par asempiu, a paga di e donne ferma 20% più bassa cà quella di l'omi à competenza para. Par ciò chì tocca à a presa in carica di i zitelli chjuchi chì riguarda sempre à spessu e donne, ci vole à mette in ballu a difficoltà ch'ellu c'hè à truvà urarii di ciucciaghje adattati à i bisogni di quelle chì travaglianu. Sta difficoltà maiò cagiona dinò problemi finanziariii è di spartitempu ch'ùn si ponu supranà. Tandù sò e donne chì sò custrette à sceglie un impiegu à tempu fraziunatu o à sacrificà a so carriera. Ste sparità trà citatine par via di u sessu troppu sò durate.

Si deve dinò assicurà u carattere libaru è inalienevule di a scelta sessuale fatta da adulti cunsententi. Hè una di e cundizione ch'ella esisti una dimucrazia vera. Ste scelte individuale ùn ponu interferi inde a pratica di a citatinanza.

Ancu si l'istituzione di u matrimoniu ùn ripresenta par noi un'ideale, hè certu ch'ella si deve impone subbitu subbitu a libartà pà ognunu di marità si di modu criligiosu o civile. Vale à di chì i dritti di e parsoni è di i gruppi messi da cantu da l'ordine sociale par mutivi sessuali (omosessuali, trassessuali, etc...) si devenu rivendicà inghjilocu senza mai stancà o rifiatà.

### **Principii di drittu custitutivi**

A citatinanza corsa ùn hè a nazionalità corsa. A nazionalità corsa s'acquista da un ascendente patrilineariu o matrilineariu. Si pò dinò acquistà cù una naturalisazione « accompagnata », firmendu una cartula di nazionalità è una certificazione in lingua è cultura corsa.

A citatinanza corsa s'acquista cù u drittu di a terra ligatu à a nuzione di cumunità di destinù, senza sfarinzià l'origine o a cultura d'ognunu ma fundèndu si nant'à u criteriu di a residenza principale in Corsica (stu criteriu ùn s'appieca micca à i militari chì ripresentanu forze d'occupazione di u Statu).

A citatinanza corsa s'acquista cù un ascendente patrilineariu o matrilineariu. I citatini corsi extra-nazionali pusseenu tutti i dritti civichi cacciati l'accessu à a funzione publica corsa in carica di a sicurezza è di l'ordine publicu.

I mandati alettivi ùn appartenenu micca à l'aletti ma à i citatini corsi.

## **Nascita di un uffiziu naziunale di a Citadinanza (Uffiziu Naziunale di a Citadinanza)**

St'arnese ùn avarà sta forma ghjuridica cà in u tempu di a riappropriazione di a so suveranità naziunale. Avale, sott'à a tutela francese, ùn si cuncipisce cà di modu transitoriu, vale à dì cum'è un associu di lege 1901 chjamatu « Associu pà a prumuzione di i diritti civichi è a citadinanza in Corsica ». Ma sarianu listesse e so missione.

Li tuccaria à prудuce carte naziunale d'identità (pà i citatini naziunali è extra naziunali). Senza valore legale inde a Ripublica francese, sti tituli avarianu pà principià cum'è scopu di rinforzà u sintimu d'appartenenza à u populu corsu. In casumai, s'ellu mutava u statutu di a Corsica, custituiscarianu documenti ufficiali d'identità.

St'uffiziu pudaria dinò travaglià à mette in opara prugrammi d'educazione citatina da rinforzà a cuezione suciale trà citatini, migliurà a cultura generale nant'à e quistione di citadinanza è valorizà u drittu di votu.

Li tuccaria à mette in ballu e dimarchje da fà pà ottene a nazionalità corsa (tutoratu, cartula d'ingaggiamentu, sezione di certificazione di lingua è cultura corsa).

Li tuccaria dinò à mette in piazza una cummissione di cuntrollu permanente di l'operazione aletturale è una cummissione d'accompagnamentu pedagogicu di i citatini ch'un votanu micca da ch'ella sia migliurata a pratica di u suffragiu.

## **Arnesi, misure pulitiche d'accompagnamentu di a citadinanza**

Cuncipisce di modu viramente dimocraticu è autogestiunariu a citadinanza impieca ch'ellu sia messu in opara un putere referendariu di rivucazione di l'aletti s'elli ùn appiecanu micca i mandati ch'elli anu ricivutu. Ma ci vole dinò fissà una misura complementaria : chì l'aletti ùn si possu prisinghje più di duie volte. (sistema di u « tourniquet »). Parmette tandu di ristringhje a professionalisazione carrierista di a pulitica.

A terza misura d'accompagnamentu hè a criazione di un putere de veto pà un CESC allargatu, cù numerosi membri di l'Assemblea di a ghjuventù . Ci tocca à sviluppà dinò camare suciale cumposte da sindacati è cumitati d'impiegati è di disimpiegati. Sta misura avaria cum'è scopu di ristringhje u raportu di forza smisuratu di e camare cunsularie nant'à l'organisazione economica è suciale di a Corsica.

Da chì a lingua corsa ùn sia una bagatella o un strumentu etnicistu o sinòfobu, ci tocca à prumove è à sustene azione d'amparera di a lingua è di a cultura corsa in un cuntestu plurilinguisticu apartu à a rumanità è ancu à una Mediterraneità da un puntu di vista socio-linguisticu. . St'azione sarianu ligate à a prumuzione è à u sustegnu d'attività di lotta contr'à a sinofobia è u razzisimu, in u cuntestu glubale d'educazione à a citadinanza, à partè si di i primi anni di a scularisazione.



*Ste pruposte indettanu bè u ricusu di tutte e forme di dummatissimu inde a nostra anàlisi. Circhemu à fà contu di u cuntestu storicu è di l'urgenza suciale è ancu sucetale. Varii aspetti parenu riformisti è pudarianu forse cunvene à urnaisazione pulitiche in difesa di l'intaresi di a piccula burghesia corsa.*

*In un tempu di risitenza di u populu corsu è di crescita di u fascisimu, l'idea d'adunisce si in giru à una citatinanza di prugressu ci pare bisugnevule è augurevule. Ma saria vera demagugia di pratende chì stu prugettu hè sustenevule in u mondu attuale.*

*I capitalisti cunsidareghjanu ogni prugettu di citatinanza para cum'è un periculu o una minaccia contr'à e so pulitiche di privatisazione di e risorse naturale è di e parsoni. U disarmamentu ideologicu è praticu di i citatini (privati di puteri veri è cuncreti) parmette à i capitalisti d'arrichisce si. In Corsica cum'è in altrò, e sparità economiche è suciale crescenu oghje più cà mai.*

*A contu nostru, militanti di A Manca, ùn si pudarà fà a prumuzione di un mudellu di citatinanza chi sia dimocraticu è paru senza appruntà a rottura cù u sistema capitalistu è a so spantichera. A ricerca di u prufittu privatu senza limita (logica è principiu di a crescita economica) inde un mondu chi hà risorse scarse, riprisenta un inciampu assultu à u bè cumunu di tutti i citatini è ùn pò garantisce a sopravvivenza di varunque cumunità, sia à a scala corsa o mundiale.*

**A MANCA**